

摘藻堂四庫全書薈要

集部

欽定四庫全書薈要卷一萬五千一百二十九

集部

山谷集卷八

宋 黃庭堅 撰

古詩五十首

武昌松風閣

次韻文潛

宿黃州觀音院鐘樓上

謝何十三送鱓

崇寧二年正月己丑夢東坡先生於寒溪西山之間

次韻吳可權題餘干縣白雲亭

鄂州節推陳榮緒崇陽道中六詩取韻奉和

頭陀寺

道中聞松聲

中秋山行懷子興節判

再登蓮落嶺懷君澤知錄

崇陽道中

晚發咸寧行松徑至蘆子

庭堅以去歲九月至鄂登南樓成長句

養鬪雞

顏徒貧樂二首

以酒渴愛江清作五小詩寄廖明略學士兼簡  
初和父主簿

四休居士詩三首

過洞庭青草湖

晚泊長沙示秦處度范元實用寄明略和父韻  
五首

次韻元實病目

勝業寺悅亭

一作阻雨福嚴

離福嚴

花光仲仁出秦蘇詩卷追少游韻

書磨崖碑後

浯溪圖

太平寺慈民閣

題淡山巖二首

明遠庵

去年三月清明蔣彥回喜太守監郡過其玉芝園作詩十六韻二侯皆有報章今年三月余到玉芝園記錄一時次其舊韻

三月辛丑有白雲出洞中散漫洞口咫尺欲不

見介石請作五字記之

代書寄翠巖新禪師

戲答歐陽誠發奉議謝余送茶歌

到桂州

以椰子茶瓶寄上德孺二首

和范信中寓居崇寧遇雨二首

乞鍾乳於曾公衮

武昌松風閣

依山築閣見平川夜闌箕斗插屋椽我來名之意適然  
老松魁梧數百年斧斤所赦今參天風鳴媧皇五十絃  
洗耳不須菩薩泉嘉二三子甚好賢力貧買酒醉此筵  
夜雨鳴廊到曉懸相看歸卧僧羶泉枯石燥復潺湲  
山川光輝為我妍野僧早飢不能餽曉見寒谿有炊煙  
東坡道人已沉泉張侯何時到眼前釣臺驚濤可晝眠  
怡亭看篆蛟龍纏安得此身脫拘攣舟載諸友長周旋

次韻文潛

武昌赤壁弔周郎寒溪西山尋漫浪忽聞天上故人來  
呼船凌江不待餉我瞻高明少吐氣君亦歡喜失微恙  
年來鬼祟覆二豪詞林根柢頗搖蕩天生大材竟何用  
只與千古拜閣像張侯文章殊不病歷險心膽元自壯  
汀洲鴻鴈未安集風雪牖戶當塞向有人出手辦茲事  
政可隱几窮諸妄經行東坡眠食地拂拭寶墨生楚愴  
水清石見君所知此是吾家秘密藏

閣像一作遺像

宿黃州觀音院鐘樓上



鐘鳴山川曉露下星斗濕老夫梳白頭潘何墳麓集

謝何十三送鱗顗

形模雖入婦女笑風味可解壯士顏寒蒲束縛十六輩  
已覺酒興生江山

崇寧二年正月己丑夢東坡先生於寒溪西山之  
間予誦寄元明觴字韻詩數篇東坡笑曰公詩  
更進於曩時因和予一篇語意清奇予擊節賞  
歎東坡亦自喜於九曲嶺道中連誦數過遂得

之

天教兄弟各異方不使新年對舉觴作雲作雨手翻覆  
得馬失馬心清涼何處胡椒八百斛誰家金釵十二行  
一丘一壑可曳尾三沐三爵取剗腸

次韻吳可權題餘干縣白雲亭

曩誰築孤亭勝日有感遇永懷劉隨州因榜白雲句遺  
老不能談歲月忽成屢綠陰斤斧盡華屋風雨仆吳侯  
七閩英宰縣有真趣絃歌解民愠根節去吏蠹材收佛

宮餘工有子來助厦成燕雀賀水滿鳬鴈翥四海名士  
來一笑佳客聚雲興碧山留雲隨清江去斯須成蒼狗  
皆道不如故至人觀萬物誰有安丘處寄語吳令君但

遣糟牀注

歲月一作新陳雲興一作雲與雲隨一作雲散

鄂州節推陳榮緒惠示泂檄崇陽道中六詩老懶  
不能追韻輒自取韻奉和

頭陀寺

頭陀全盛時宮殿梯空級城中望金碧雲外僧觶觶人

亡經禪盡屋破龍象泣唯有簡栖碑文章巍然立

王巾字簡

栖

道中聞松聲

蟠空作風雨發地鳴鼓吹日晴四無人聲在高林際伊  
優兒女語蹇淺市井議我欲抱七絃寫此以卒歲

中秋山行懷子興節判

俗物常塙塞令人眼生白永懷洛陽人談詩論畫壁青  
山吐秋月阻作南樓客但歌靡盬詩賞此無瑕璧

眼生白一

作眼  
生角

再登蓮落嶺懷君澤知錄

邑下羹不和幕中往調護紛爭非士則各使捐細故頗  
憶郝參軍能令公喜怒應知鞅掌車厯盡崔嵬路

崇陽道中

張公少為令愍俗有遺書左販洞庭橘右擔彭蠡魚歌  
奔中夜女歸抱十年雛借一韻近歲多儒學仁風似有初

晚發咸寧行松徑至蘆子

咸寧走蘆子終日喬木陰太丘心灑落古松韻清深聊  
持不俗耳靜聽無絃琴非今胡部律而獨可人心

庭堅以去歲九月至鄂登南樓歎其制作之美成

長句久欲寄遠因循至今書呈公悅

懌

江東湖北行畫圖鄂州南樓天下無高明廣深勢抱合  
表裡江山來畫閣雪筵披襟夏簟寒胸吞雲夢何足言  
庾公風流冷似鐵誰其繼之方公悅

閣一作閣

養關雞

崢嶸已介季氏甲更以黃金飾兩戈雖有英心甘鬪死  
其如紀消木雞何

顏徒貧樂二首

衡門低首過環堵容膝坐四旁無給侍百衲自纏裹論  
事直如絃觀書曲肱卧飢來或乞食有道無不可

小山作友朋義重子輿桑香草當姬妾不須珠翠粧烏  
鳥窺凍硯星月入幽房兒報無炊米浩歌繞屋梁

以酒渴愛江清作五小詩寄廖明略學士兼簡初

和父主簿

正一  
虞世

將發沔鄂間盡醉竹林酒  
二三名友輩未肯弃老朽  
借問坐客誰盧溪紫髯叟  
此翁今惜醉舊不論升斗

平生思故人江漢不解渴  
誰言放逐地燒燭飲至跋  
憂予先狗馬勸以愛膚髮  
有罪當竄流但懼不得活

廖侯勸我酒此亦雅所愛  
中年剛制之常懼作災恠  
連臺盤扣倒故人不思貸  
誰能知許事痛飲且一快

竹林文章伯國士無與雙  
比來少制作非以弱故降  
景



陽機中錦猶衣被丘江時時能度曲秀句入新腔  
斯人絕少可白眼視公卿每與俗物逢三沐取潔清我  
亦漫浪者君何許同盟試問盧溪叟猶得多可名

四休居士詩

并序

太醫孫君昉字景初為士大夫發藥多不受謝自號  
四休居士山谷問其說四休笑曰麤茶淡飯飽即休  
補破遮寒暖即休三平二滿過即休不貪不妬老即  
休山谷曰此安樂法也夫少欲者不伐之家也知足

者極樂之國也四休家有三畝園花木鬱鬱客來煮茗傳酒談上都貴游人間可喜事或茗寒酒冷賓主皆忘

一本有倦字

其居與予相望暇則步草徑相尋故作

小詩遣家僮歌之以侑酒茗其詩曰

富貴何時潤髑髏守錢奴與抱官囚太醫診得人間病  
安樂延年萬事休

無求不著看人面有酒可以留人嬉欲知四休安樂法  
聽取山谷老人詩

一病能惱安樂性四病長作一生愁借問四休何所好  
不令一點上眉頭

過洞庭青草湖

乙丑越洞庭丙寅渡青草似為神所憐雪上日杲杲我  
雖貧至骨猶勝杜陵老憶昔上岳陽一飯從人討行矣  
勿遲留蕉林追獼獠

晚泊長沙示秦處度范元實用寄明略和父韻五

首  
溫湛

昔在秦少游許我同門友掘獄無張雷劒氣在牛斗今  
來見令子又似前哲有何用相澆潑清江淥如酒

范公太史僚山立乃先達發揮百代史管以六經轄投  
身轉嶺海就木乃京洛仲子見長沙且用慰飢渴

秦郎水江漢范郎噐鼎鼎逝者不可尋猶喜二子在相  
逢唾珠玉貧病問新菜豫愁汎風船目極別所愛

往時高交友宰木已樅樅今我二三子事業在燈窓秦  
范波瀾濶笑陸海潘江願茲秉經術出仕榮家邦

少游五十策其言明且清筆墨深關鍵開闔見日星陳  
友評斯文如鐘磬鼓笙誰能續鳳鳴洗耳聽兩甥

秦范  
相謂

甥為

次韻元實病目

道人嘗恨未灰心儒士苦愛讀書眼要須玄覽照鏡空  
莫作白魚鑽蠹簡閱人朦朧似有味看字昏澁尤宜懶  
范侯年少百夫雄言行一一無可東看君眸子當瞭然  
乃稱胃次常坦坦如何有物食明月淚睫隕珠衣袖滿

金篦刮膜會有時湯熨取快術誠短君不見岳頭懶瓚  
一生禪鼻涕垂頤渠不管

勝業寺悅亭

一作阻  
雨福巖

苦雨已解嚴諸峯來獻狀不見白頭禪空倚紫藤杖

離福巖

山下三日晴山上三日雨不見祝融峯還泝瀟湘去

花光仲仁出秦蘇詩卷思兩國士不可復見開卷  
絕嘆因花光為我作梅數枝及畫煙外遠山追

少游韻記卷末

夢蝶真人貌黃稿籬落逢花湏醉倒雅聞花光能畫梅  
更乞一枝洗煩惱扶持愛梅說道理自許牛頭參已早  
長眠橘洲風雨寒今日梅開向誰好何況東坡成古丘  
不復龍蛇看揮掃我向湖南更嶺南繫船來近花光老  
歎息斯人不可見喜我未學霜前草寫盡南枝與北枝  
更作千峯倚晴昊

書磨崖碑後

春風吹船著

音斫

浯溪扶藜上讀中興碑平生半世看墨

本摩挲石刻鬢成絲明皇不作苞桑計顛倒四海由祿  
兒九廟不守乘輿西萬官已作烏擇栖撫軍監國太子  
事何乃趣取大物為事有至難天幸爾上皇跼蹐還京  
師內間張后色可否外間李父頤指揮南內淒涼幾苟  
活高將軍去事尤危臣結春陵二三策臣甫杜鵑再拜  
詩安知忠臣痛至骨世上但賞瓊琚詞同來野僧六七  
輩亦有文士相追隨斷崖蒼蘚對立久凍雨為洗前朝



悲

浯溪圖

成子寫浯溪下筆便造極空濛得真趣膚寸已千尺只  
今中宮寺在昔漫郎宅更作老夫船檣竿插蒼石

太平寺慈民閣

晚與曾公  
袞同登

青玻瓈盆插千岑湘江水清無古今何處拭目窮表裏  
太平飛閣暫登臨朝陽不聞阜蓋下愚溪但有古木陰  
誰與洗滌懷古恨坐有佳客非孤斟

題淡山巖二首

去城二十五里近天與隔盡俗子塵春蛙秋蠅不到耳  
夏涼冬暖總宜人巖中清磬僧定起洞口綠樹仙家春  
惜哉次山世未顯不得雄文鏡翠珉

淡山淡姓人安在徵君避秦亦不歸石門竹徑幾時有  
瓊臺瑤室至今疑回中明潔坐十客亦可呼樂醉舞衣  
閬州城南果何似永州淡巖天下稀

明遠庵

遠公引得陶潛住美酒沽來飲無數我欲醉眠卿且去  
只有空瓶同此趣誰知明遠似遠公亦欲我行庵上路  
多方挈取甕頭春大白梨花十分注與君深入逍遙游  
了無一物當情素道卿道卿歸去來明遠主人今進步

道卿涪  
溪僧

去年三月清明蔣彥回喜太守監郡過其玉芝園  
作詩十六韻二侯皆有報章今年三月余到玉  
芝園記錄一時次其舊韻

春生瀟湘水風鳴澗谷泉過雨花漠漠弄晴絮翩翩名  
園上朱閣觀後復觀前借問昔居人岑絕無炊煙人生  
須富貴河水清且漣百年共如此安用涕潺湲蔣侯真  
好事杖屨喜接連車載溪中骨堆排若差肩厭看孔壬  
面醜石反成妍感君勸我醉吾亦無間然亂我朱碧眼  
空花墜便翔行動須人扶那能金石堅愛君雷式琴湯  
湯發朱絃但恨賞音人大半隨逝川平生有詩罪如痼  
不可痊今當痛自改三覺復三淵

三月辛丑同徐靖國到愚溪過羅氏脩竹園入朝  
陽洞蔣彥回陶介石僧崇廣及余子相步及余  
於朝陽巖裴回水濱久之有白雲出洞中散漫

洞口咫尺欲不相見介石請作五字記之

裴一作俳

意行到愚溪竹輿鳴擔肩冉溪昔居人埋沒不知年偶  
託文字工遂以愚溪傳柳侯不可見古木蔭濺濺羅氏  
家瀟東瀟西讀書園笋茁不避道檀欒搖春煙下入朝  
陽巖次山有銘鐫薛石破篆文不辨瞿李袁嵌竇響笙

磬洞中出寒泉同遊四五客拂石弄潺湲俄頃生白雲  
似欲駕我仙吾將從此逝挽牽遂回船

代書寄翠巖新禪師

山谷青石牛自負萬鈞重八風吹得行處處是日用又  
將十六口去作宜州夢苦憶新老人是我法梁棟信手  
斫方圓規矩一一中遙思靈源叟分坐法席共聊持楚  
狂句往作天女供嶺上早梅春參軍慙獨弄

戲答歐陽誠發奉議謝余送茶歌

歐陽子出陽山山竒水怪有異氣生此突兀熊豹顏飲  
如江入洞庭野詩成十手不供寫老來抱璞向涪翁東  
坡元是知音者蒼龍璧官焙香涪翁投贈非世味自許  
詩情合得嘗却思翰林來餽光祿酒兩家永鑒共寒光  
予乃安敢比東坡有如玉槃金叵羅直相千萬不啻過  
愛公好詩又能多老夫何有更橫戈奈此千思百戰何  
到桂州

桂嶺環城如鴈蕩平地蒼生忽嶒峨李成不在郭熙死

奈此百嶂千峯何

以椰子茶餅寄德孺二首

碩果實林梢可以代懸匏  
携持二十年煮茗當酒肴  
我今禦魑魅學打衲僧包  
聊持堅重器遺我金石交

炎丘椰木實入用隨茗椀  
譬如楮石砮但貴從來遠  
往時萬里物今在籬落間  
知公一拂拭想我瘴霧顏

和范信中寓居崇寧遇雨二首

寥

范侯來尋八桂路走避俗人如脫兔  
衣囊夜雨寄禪家



行潦升堦漂兩屨遣悶悶不離眼前避愁愁已知人處  
慶公憂民苗未立旻公憂水水推去兩禪有意開壽域  
歲晚築室當百堵它時無屋可藏身且作五里公超霧  
當年游俠成都路黃犬蒼鷹伐狐兔二十始肯為儒生  
行尋丈人奉巾屨千江渺然萬山阻抱衣一囊遍處處  
或持劒掛宰上回亦有酒罷壺中去昨來禪榻寄曲肱  
上雨傍風破環堵何時鯢化北溟波好在豹隱南山霧

乞鍾乳於曾公衮

糾

寄語曾公子金丹幾時熟願持鍾乳粉實此罄懸腹遙  
憐蠚眼湯已化驚管玉刀圭勿妄傳此物非碌碌

山谷集卷八

欽定四庫全書薈要卷一萬五千一百三十

集部

山谷集卷九

宋 黃庭堅 撰

律詩九十二首

東觀讀未見書

歲寒知松栢

被褐懷珠玉

款塞來享

送舅氏野夫之宣城二首

王聖美三子補中廣文生

謝王炳之惠石香鼎 次韻柳通叟寄王文通

次韻王定國揚州見寄

寄黃幾復

次韻幾復和答所寄

次韻崔伯易席上所賦因以贈行二首

同子瞻韻和趙伯充團練

送顧子敦赴河東三首

寄上叔父夷仲三首  
詠雪奉呈廣平公

次韻宋楙宗僦居甘泉坊雪後書懷

次韻宋楙宗三月十四日到西池

次韻張昌言給事喜雨

和答錢穆父詠猩猩毛筆

次韻奉酬劉景文河上見寄

見諸人唱和酴醾詩輒次韻戲詠

次韻秦少章晁適道贈答詩

陳留市隱

并序

嘲小德

清人怨戲效徐庾慢體三首

秋思寄子由

子瞻去歲春夏侍立延英子由秋冬間相繼入  
侍作詩各述所懷予亦次韻四首

再次韻四首

次韻游景叔聞洮河捷報寄諸將四首

謝鄭閔中惠高麗畫扇二首

戲贈米元章二首

次韻徐文將至國門見寄二首

趙子充示竹夫人詩予為名曰青奴并以小詩

取之二首

青奴一作竹奴

往歲過廣陵值早春嘗作詩戲以前韻寄王定

國二首

謝公擇舅分賜茶三首

呈外舅孫莘老二首

以天壇靈壽杖送莘老

從張仲謀乞蠟梅

乞姚花二首

寄杜家父二首

王才元舍人許牡丹求詩



謝王舍人剪送狀元紅

寺齋睡起

次韻王稚川客舍二首

同元明過洪福寺戲題

戲答晁適道乞消梅二首

題淨因壁二首

以梅餽晁深道戲贈二首

憶邢惇夫

戲答張秘監饋羊

戲詠猩猩毛筆

客有和予前篇為猩猩解嘲者復戲作詠

六月十七日晝寢

北窓

題伯時天育驃騎圖二首

子瞻寺壁作小山枯木

題惠崇畫扇

題郭熙山水扇

題劉將軍鴈

東觀讀未見書

已下擬省  
題四首

漢規羣玉府東觀近宸居詔許無雙士來觀未見書皇

文開萬卷家學陋三餘竹帛森延閣星辰繞直廬諸生  
起孤賤天子自吹噓願以多聞力論思補帝裾

歲寒知松栢

羣陰彫品物松栢尚桓桓老去惟心在相依到歲寒霜  
嚴御史府雨立大夫官犧象溝中斷徽絃爨下殘光陰  
一鳥過斬一作剪伐萬牛難春日輝桃李蒼顏亦預觀

被褐懷珠玉

國士懷珠玉通經不易扛櫝藏心有待褐短義難降寶

唾歸青簡晴虹貫夜窓  
直言方按劍豈是故迷邦  
彈雀輕千仞連城買一雙  
安知藍縷底明月弄寒江

欵塞來享

前朝夏州守來欵塞門  
西聖主敷文德降書付狄鞬  
羶裘瞻日月務面帶金犀  
殿陞間干羽邊亭息鼓輦  
永輸量谷馬不作觸藩羝  
聲勢常相倚今聞定五溪

送舅氏野夫之宣城二首

李莘

籍甚宣城郡風流數貢毛  
霜林收鴨脚春網薦琴高  
共

理須良守今年輟省曹平生割鷄手聊試發硎刀  
試說宣城郡停盃且細聽晚樓明宛水春騎簇昭亭  
程豐圩戶析楊卧訟庭謝公歌舞處時對換鵝經

王聖美三子補中廣文生

子韶

王家人物從來遠今見諸生總好賢三級定知魚尾進  
一鳴已作鴈行連愧無藻鑑能推轂願卷囊書當贈錢  
歸去雄誇向兒姪舍中犢子賸狂顛

謝王炳之惠石香鼎

薰鑪宜小寢鼎製琢晴嵐香潤雲生礎煙明虹貫巖法  
從空處起人向鼻頭參一炷聽秋雨何時許對談

次韻柳通叟寄王文通

故人昔有凌雲賦何意陸沉黃綬間頭白眼花行作吏  
兒婚女嫁望還山心猶未死杯中物春不能朱鏡裏顏  
寄語諸公肯湔祓割雞今得近鄉關

次韻王定國揚州見寄

清洛思君晝夜流北歸何日片帆收未生白髮猶堪酒

垂上青雲却佐州飛雪堆盤鱠魚腹明珠論斗煮雞頭  
平生行樂自不惡豈有竹西歌吹愁

寄黃幾復

乙丑年德平鎮作

我居北海君南海寄鴈傳書謝不能桃李春風一杯酒  
江湖夜雨十年燈持家但有四立壁治病不蘄三折肱  
想得讀書頭已白隔溪猿哭瘴溪藤

次韻幾復和答所寄

海南海北夢不到會合乃非人力能地福未堪長袖舞

夜寒空對短檠燈相看鬢髮時窺鏡曾共詩書更曲肱  
作箇生涯終未是故山松長到天籐

次韻崔伯易席上所賦因以贈行二首

迎新與送故渠已不勝勤民賣腰間劍公寬柱後文諸  
郎投賜沐高會惜臨分去國雖千里分憂即近君

老惜交情別追隨車馬勤臨朝思共理治郡復斯文訟

息常一作當休吏民貧更勸分西湖十頃月自比漢封君

同子瞻韻和趙伯充團練



金玉堂中寂寞人仙班時得共朝真兩宮無事安磐石  
萬國歸心有老臣家釀可供開口笑侍兒工作捧心顰  
醉鄉乃是安身處付與升平作幸民

送顧子敦赴河南三首

頭白書林二十年印章今領晉山川紫參可掘宜包貢  
青鐵無多莫鑄錢勸課農桑誠有道折衝樽俎不臨邊  
要知使者功多少看取春郊處處田

家在江東不繫懷愛民憂國有從來月斜汾沁催驛馬

雪暗岢嵐傳酒杯塞上金湯唯粟粒胸中水鏡是人才  
遙知更解青牛句一寸功名心已灰

攬轡都城風露秋行臺無妄護衣篝虎頭墨妙能頻寄  
馬乳葡萄不待求上黨地寒應強飲兩河民病要分憂  
猶聞昔在軍興日一馬人間費十牛

寄上叔父夷仲三首

少年有功翰墨林中歲作吏幾陸沉庖丁解牛妙世故  
監市履狶知民心萬里書來兒女瘦十月山行冰雪深

夢魂和月繞秦隴漢節落毛何處尋

艱難聞道有歸音部曲霜行壁月沉王春正月調玉燭  
使星萬里朝天心頗令山海藏國用乃見縣官恤民深  
經心隴蜀封疆守必有人材備訪尋

關寒塞雪欲嗣音燕鴈拂天河鯉沉百書不如一見面  
幾日歸來兩慰心弓刀陌上望行色兒女燈前語夜深  
更懷父子東歸得手種江頭柳十尋

詠雪奉呈廣平公

宋盈祖

連空春雪明如洗，忽憶江清水見沙。  
夜聽疎疎還密密，曉看整整復斜斜。  
風回共作婆娑舞，天乃乃一作巧能開頃刻花。  
政使盡情寒至骨，不妨桃李用年華。

次韻宋楙宗僦居甘泉坊雪後書懷

漢家太史宋公孫，漫逐班行謁帝閭。  
燕領封侯空有相，蛾眉傾國自難昏。  
家移四壁書侵坐，馬瘦三山葉擁門。  
安得風帆隨雪水，江南石上對窪尊。  
馬瘦一作馬聳

次韻宋楙宗三月十四日到西池都人盛觀翰林

公出遨

金狨繫馬曉鶯邊，不比春江上水船。  
人語車聲喧法曲，花光樓影倒晴天。  
人間化鶴三千歲，海上看羊十九年。  
還作遨頭驚俗眼，風流文物屬蘓仙。

次韻張昌言給事喜雨

五兩全清六合塵，詩翁喜雨句凌雲。  
埵漂戰蟻餘追北，柱擊乖龍有裂文。  
減去鮮肥憂玉食，徧宗河嶽起鑪薰。  
聖功惠我豐年食，未有涓埃可報君。

和答錢穆父詠猩猩毛筆

愛酒醉魂在能言機事疎平生幾量屐身後五車書物  
色看王會勲勞在石渠拔毛能濟世端為謝楊朱

次韻奉酬劉景文河上見寄

省中岑寂坐雲窻忽有歸鴻拂建章珍重多情惟石友  
琢磨佳句問潛郎遙憐部曲風沙裏不廢平生翰墨場  
想見哦詩煮春茗向人懷抱去關防

見諸人唱和酴醾詩輒次韻戲詠

梅殘紅藥遲此物共春歸名字因壺酒風流付枕幃墜  
鈿香徑草飄雪淨垣衣玉氣晴虹發沉材鋸屑霏直知  
多不厭何忍摘令稀常恨金沙學顰時正可揮

次韻秦少章晁適道贈答詩

二子論文地陰風雪塞廬寧穿東郭履不奉子公書士  
固難推挽時聞有詔除負暄真得計獻御恐成疎

陳留市隱

并序

陳留市中有刀鐻工與小女居得錢父子飲于市醉

則負其子行歌不通名姓江端禮傳其事以為隱者  
吾友陳無已為賦詩庭堅亦擬作

市井懷珠玉往來終

一作斯人初

未逢乘肩嬌小女邂逅此生

同養性霜刀在閱人清鏡空時時能舉酒彈鐻送飛鴻

### 嘲小德

中年舉兒子漫種老生涯學語囀春鳥塗窓行莫鴉欲

嗔王母惜稍慧女兄誇解著潛夫論不妨無外家

一作學語

春蟲貼書窓秋鴈斜待  
渠能小艇伴我釣煙沙



清人怨戲效徐庾慢體三首

秋水無言度荷花稱意紅主人敬愛客催喚出房籠一

斛明珠曲何時落塞鴻試煩春筍手聊為剥蓮蓬

一作  
撥萍

蓬

障羞羅袂薄承汗領巾紅晚風斜蠹髮逸艷照窓籠胡  
琴抱明月寶瑟陣歸鴻倚壁生珠網年光如轉蓬

翡翠釵梁碧石榴帟摺紅隙光斜斗帳香字冷薰籠聞  
道西飛燕將隨北固鴻鴛鴦會獨宿風雨打船蓬

秋思寄子由

黃落山川知晚秋，小蟲催女獻功裘。  
老松閱世卧雲壑，挽著滄江無萬牛。

子瞻去歲春夏侍立延英，子由秋冬間相繼入侍，作詩各述所懷，予亦次韻四首。

赤壁歸來入紫清，堂堂心在鬢彫零。  
江沙跼破青鞵底，却結絲絢侍禁庭。

胷蟠萬卷夜光寒，筆倒三江硯滴乾。  
大似不蒙稽古力，

只今猶著侍臣冠

對掌絲綸罷記言  
職親黃屋傍堯軒  
鴈行飛上猶回首  
不受青雲富貴吞

樂天名位聊相似  
却是初無富貴心  
只欠小蠻樊素在  
我知造物愛公深

再一作初次韻四首

隆儒殿閣對橫經  
咫尺清都雨露零  
見說文星環北極  
人間無路仰天庭

風櫺倒影日光寒堯日當中露正乾殿上給扶鳴漢履  
螭頭簪筆見秦冠

萬國歸心天不言諸儒爭席異臨軒聖功典學形歌頌  
更覺曹劉不足吞

延和西路古槐陰不隔朝宗夙夜心公有胃中五色線  
平生補袞用功深

次韻游景叔聞洮河捷報寄諸將四首

千仞谿中石轉雷漢家萬騎擣虛回定知獻馬胡雛入

省即稱觴都護來

中原日月九夷知不用禽羌  
釁鼓旗更向天階舞干羽

降書刺破一年遲

聞洮西  
捷報

漢得洮州箭有神  
斬關禽敵不逡巡  
將軍快上屯田計  
要納降羌十萬人

遙知一炬絕河津  
生縛青宜不動塵  
付與山川印如斗

忍為鼠子腹心人

聞洮東  
捷報

謝鄭閔中惠高麗畫扇二首

會稽內史三韓扇分送黃門畫省中海外人煙來眼界  
全勝博物注魚蟲

蘋汀游女能騎馬傳道蛾眉畫不如寶扇真成集陳隼  
史臣今得殺青書

戲贈米元章二首

萬里風帆水著天麝煤鼠尾過年年滄江靜夜虹貫月  
定是米家書畫船

我有元暉古印章印刻不忍與諸郎虎兒筆力能扛鼎

教字元暉繼阿章

次韻徐文將至國門見寄二首

槐催舉子著花黃  
來食邯鄲道上粱  
便欲掃牀懸麈尾  
正愁喘月似燈光

千頭剖蚌明珠熟  
百尺垂絲鱸縷長  
柳下石門君有此  
可能衝雪厭清涼

趙子充示竹夫人詩  
蓋涼寢竹器憇臂休膝似非

夫人之職予為名曰青

一作竹

奴并以小詩取之

二首

青奴元不解梳粧  
合在禪齋夢蝶牀  
公自有人同枕簟  
肌膚冰雪助清涼

穠李四絃風拂席  
昭華三弄月侵牀  
我無紅袖堪娛夜  
政要青奴一味涼

往歲過廣陵  
值早春嘗作詩云  
春風十里珠簾卷  
髻髻三生杜牧之  
紅藥梢頭初蠶栗  
揚州風物鬢成絲  
今春有自淮南來  
者道揚州事戲以前



韻寄王定國二首

淮南二十四橋月馬上時時夢見之想得揚州醉年少  
正圍紅袖寫烏絲

日邊置論誠深矣聖處時中乃得之莫作秋蟲促機杼  
貧家能有幾絢絲

謝公擇舅分賜茶三首

外家新賜蒼龍璧北焙風煙天上來明日蓬山破寒月  
先甘和夢聽春雷

文書滿案惟生睡夢裏鳴鳩喚雨來乞與降魔大圓鏡  
真成破柱作驚雷

細題葉字包青箬割取丘郎春信來拚洗一春湯餅睡

亦知清夜有蚊雷

丘子進  
外家壻

呈外舅孫莘老二首

九陌黃塵烏帽底五湖春水白鷗前扁舟不為鱸魚去  
收取聲名四十年

甓社湖中有明月淮南草木借光輝故應剖蚌登王室

不若含沙弄夕霏

以天壇靈壽杖送莘老

王屋千霜老紫藤扶公休沐對親朋異時駟馬安車去  
拄到天壇願力能

從張仲謀乞蠟梅

聞君寺後野梅發香蜜染成官樣黃不擬折來遮老眼  
欲知春色到池塘

乞姚花二首

正是風光嬾困時  
姚黃開晚落應遲  
欲雕好句乞春色  
日歷如山不到詩

青春日月鳥飛過  
汗簡文書山疊重  
乞取好花天上看

宮衣黃帶御爐風

風一作烘

寄杜家父二首

紅紫爭春觸處開  
九衢終日犢車雷  
閒情欲被春將去  
鳥喚花驚只麼回

風塵點汗青春面  
自汲寒泉洗醉紅  
徑欲題詩嫌浪許

杜郎覓句有新功

王才元舍人許牡丹求詩

聞道潛溪千葉紫  
主人不剪要題詩  
欲搜佳句恐春老  
試遣七言賒一枝

謝王舍人剪送狀元紅

清香拂袖剪來紅  
似繞名園曉露叢  
欲作短章憑阿素  
緩歌誇與落花風

寺齋睡起

桃李無言一再風黃鸝唯見綠忽忽人言九事八為律  
儻有江船吾欲東

次韻王稚川客舍二首

舊詩

五湖歸夢常苦短一寸客愁無奈多慈母每占烏鵲喜  
閨人應賦戍戍歌

百里奚仕秦其妻歌曰百里奚五羊皮憶別時烹伏雌炊戍戍今日富貴

忘我  
為

身如病鶴翅翎短心似亂絲頭緒多此曲朱門歌不得  
湖南湖北竹枝歌

同元明過洪福寺戲題

洪福僧園拂紺紗  
舊題塵壁似昏鴉  
春殘已是風和雨  
更着游人撼落花

戲答晁適道乞消梅二首

青莎徑裏香未乾  
黃鳥陰中實已團  
烝豆作烏鹽作白  
屬聞丹杏薦牙盤

北客未嘗眉自顰  
南人誇說齒生津  
磨錢和蜜誰能許  
去蒂供鹽亦可人

題淨因壁二首

瞑倚團蒲挂鉢囊半窓踈箔度微涼蕉心不展待時雨

葵葉為誰傾夕陽

挂鉢囊一作畫夢長

閒外黃塵不見山此中草木亦常閒履聲如度薄冰過  
催粥華鯨吼夜闌

以梅餽晁深道戲贈二首

帶葉連枝摘未殘依稀茶塢竹籬間相如病渴應須此  
莫與文君蹙遠山



渴夢吞江起解顏詩成有味齒牙間前身鄴下劉公幹  
今日江南庾子山

憶邢惇夫

詩到隨州更老成江山為助筆縱橫眼看白壁埋黃壤  
何況人間父子情

戲答張祕監饋羊

細肋柔毛飽卧沙煩公遣騎送寒家忍令無罪充庖宰  
留與兒童駕小車

戲詠猩猩毛筆

枕椰葉暗檳榔紅朋友相呼墮酒中政以多知巧言語  
失身來作管城公

客有和予前篇為猩猩解嘲者復戲作詠

明窓脫帽見蒙茸醉着青鞋在眼中束縛歸來儻無辱  
逢時猶作黑頭公

六月十七日晝寢

紅塵席帽烏韉裏想見滄洲白鳥雙馬齧枯萁諠午枕

夢成風雨浪翻江

北窓

生物趨功日夜流  
園林才夏麥先秋  
綠陰黃鳥北窓簾  
付與來禽安石榴

題伯時天育驃騎圖二首

玉花照夜今無種  
樨上追風亦不傳  
想見真龍如此筆  
疾藜沙晚草迷川

明窓槃礴萬物表  
寫出人間真乘黃  
邂逅今身猶姓李

可非前世江都王

子瞻寺壁作小山枯木

海內文章非畫師能回筆法作枯枝  
豫章從小有梁棟也似鄭公雙鬢絲

題惠崇畫扇

惠崇筆下開江面萬里晴波向落暉  
梅影橫斜人不見鴛鴦相對浴紅衣

題郭熙山水扇

郭熙雖老眼猶明便面江山取意成一段風煙且千里  
解如明月逐人行

題劉將軍鴈

將軍一矢萬人看雪灑晴空碎羽翰乞與失羣沙宿鴈  
筆間千頃暮江寒


山谷集卷九

謹案卷七第九頁前三行吳溪浣紗女刊本紗訛  
沙據別本改

卷八第五頁前三行誰家金釵十二行刊本行訛  
竹據別本改

欽定四庫全書





總校官庶吉士臣張能照

校對官中書臣張九鐔

校對官中書臣王家賓

膳錄監生臣龍翔

膳錄舉人臣武先振



欽定四庫全書薈要

集部

山谷集卷十二

詳校官助教臣常循



欽定四庫全書薈要卷一萬五千一百三十一

集部

山谷集卷十

宋 黃庭堅 撰

律詩七十八首

和答元明黔南贈別 贈黔南賈使君

萬州太守高仲本宿約遊岑公洞而夜雨連明

戲作二首

萬州下巖奉其命二篇其一用楊子安韻其一

用王定國韻

又戲題下巖



外姪李光祖寄嗣直小詩次韻書其後

知命

戲題巫山縣用杜子美韻

戲答劉文學

知命

馬上口號呈建始李令

知命

次韻答清江主簿趙彥成

知命

將次施州先寄張十九使君三首

知命

和仲謀送別二首

知命

題蘇若蘭回文錦詩圖

宋楙宗寄夔州五十詩三首

知命

次韻楙宗送別二首

知命

次韻黃斌老晚游池亭二首

次韻楊君全送酒長句

次韻君全送春花

謝楊景仁承事送惠酒器

戲答史應之三首

謝應之

應之送春花

答李任道謝分豆粥

次韻文少微判官祈雨有感

次韻少微甘露降太守居桃葉上

次韻奉答少微紀贈二首

走筆謝王朴居士拄杖

戲答王居士送文石 次韻馬荊州

次韻答馬中玉三首 次韻中玉早梅二首

次韻中玉水仙花二首

吳君送水仙花并二大本

劉邦直送早梅水仙花三首

贈李輔聖

和高仲本喜相見

戲呈聞善二兄

次韻聞善

戲答王觀復醑醕菊二首

戲答荊州王充道烹茶四首

次韻答高子勉十首

入窮巷謁李材叟翹叟戲贈兼簡田子平三首

呈楊康國

又戲呈康國

和中玉使君晚秋開天寧節道場

謝益修四弟送石屏

和答元明黔南贈別

萬里相看忘逆旅三聲清淚落離觴  
朝雲往日攀天夢夜雨何時對榻涼  
急雪春令相並影驚風鴻鴈不成行  
歸舟天際常回首從此頻書慰斷腸

贈黔南賈使君

綠髮將軍領百蠻橫戈得句一開顏  
少年圯下傳書客老去崆峒問道山  
春入鶯花空自笑秋成梨棗為誰攀  
何時定作風光主待得征西鼓吹還

萬州太守高仲本宿約遊岑公洞而夜雨連明戲  
作二首

肩輿欲到岑公洞正怯衝泥傍險行定是岑公閱清境  
春江一夜雨連明

蓬窓高枕雨如繩恰似糟牀壓酒聲今日岑公不能飲  
吾儕聞健且頻傾

萬州之下巖唐末有劉道者定州無極人聞道於  
雲居膺禪師為開巖第一祖法號道微自鑿石



龕曰死便藏龕中不用日時門人奉其命二百年來遊者題詩不可勝讀莫能起此開巖者故予作二篇表見之其一用楊子安韻其二用王定國韻

用楊子安韻一篇  
在古詩第五卷

寺古松楠老嵒虛塔廟開僧緣蠶麥去官數荔支來石室無心骨金鋪稱意苔若為劉道者拽得鼻頭迴

又戲題下巖

往往携家來託宿裙襦參錯佛衣巾未嫌滿院油頭臭

蹋破苔錢最惱人

外姪李光祖往見尚垂髫今觀寄嗣直小詩已可

愛因次韻

知命

昔別長安未裹頭如今詩句可消愁外家未覺風流遠

佗日相期到益州

李公擇終  
於益州帥

戲題巫山縣用杜子美韻

巴俗深留客吳儂但憶歸直知難共語不是故相違東  
縣聞銅臭江陵換袂衣丁寧巫峽雨慎莫暗朝暉

戲答劉文學

知命

人鮪甕中危萬死鬼門關外更千岑  
問君底事向前去要試平生鐵石心

馬上口號呈建始李令

知命

驛亭新似眼般明  
筭路開如掌樣平  
誰與長官歌美政  
風搖松竹是懽聲

次韻答清江主簿趙彥成

知命

日轉溪山幾百遭  
厭聞虎嘯與猿號  
笙歌忽把二天酒

風雨猶驚三峽濤已作齊民尋要術安能痛飲讀離騷  
看君自是青田質清唳當聞徹九臯

將次施州先寄張十九使君

知命

書來日日覺情親今信施州是故人許我投名重入社  
放狂作惱未應嗔

收拾從來古錦囊今知老將敵難當囊中尚有毛錐子  
花底尊前作戰場

一別施州向十霜傳聞佳句望風降空卷不易當堅敵

振臂猶思起病瘡

和仲謀送別二首

知命

夜郎自古流遷客聖世初投第一人不見施州肯回首  
五溪三峽更誰親

五溪三峽漫經春百病千愁逢故人何處看君歲寒後  
欲將兒女更論親

題蘇若蘭回文錦詩圖

千詩織就回文錦如此陽臺暮雨何亦有英靈蘇蕙手

只無悔過竇連波

宋楙宗寄夔州五十詩三首

知命

五十清詩是碎金  
試交擲地有餘音  
方今臺閣稱多士  
且傍江山好處吟

五十清詩一段冰  
持來恰得慰愁生  
自張壁間行坐看  
更交兒誦醉時聽

碑同峴首千年石  
詩到夔州十絕歌  
侂日巴人懷叔子  
時時解著手摩挲

次韻楸宗送別二首

知命

一百八盤天上路去年明日送流人  
小詩話別堪垂淚却道情親不得親

別駕柴門閉一春艱難顛沛不忘君  
何時幽谷回天日教保餘生出瘴雲

次韻黃斌老晚遊池亭二首

路入東園無俗駕忽逢佳士喜同遊  
綠荷菡萏稍覺晚黃菊拒霜殊未秋  
客位正須懸榻下主人自愛小塘幽

老夫多病蠻江上頗憶平生馬少游

客位一作客至

岑寂東園可散愁膠膠擾擾夢神遊  
萬竿苦竹旌旗卷一部鳴蛙鼓吹休  
雨後月前天欲冷身閒心遠地常幽  
杜門謝客恐生謗且作人間鷗鷖游

次韻楊君全送酒長句

扶衰却老世無方唯有君家酒未嘗  
秋入園林花老眼茗搜文字響枯腸  
醉頭夜雨排簷滴盃面春風繞鼻香  
不待澄清遣分送定知佳客對空觴



次韻君全送春花

化工能幹大鈞迴不得東君花不開誰道纖纖綠窻手  
并刀剪綵喚春來

謝景仁承事送惠酒器

楊君喜我梨花盞却念初無注酒魁  
矮金壺肯持送  
按菽殘菊更傳杯

戲答史應之三首

先生早擅屠龍學袖有新硯不試刀  
歲晚亦無雞可割

庖蛙煎鱖薦松醪

老菜有婦懷高義不厭夫家苜蓿盤  
收得千金不龜藥  
短裙漂紉草江寒

甌有輕塵釜有魚漢庭日日名嚴徐  
不嫌藜藿來同飯  
更展芭蕉看學書

謝應之

昨夜風雷震海隅天心急擬活焦枯  
去年席上蛟龍語  
未委先生記得無

應之送春花

千林搖落照秋空，忽散穠花在眼中。  
蝶繞蜂隨俱入座，君家女手化春風。

答李任道謝分豆粥

豆粥能驅晚瘴寒，與公同味更同餐。  
安知天上養賢鼎，且作山中煮菜菔。

次韻文少微推官祈雨有感

窮儒憂樂與民同，何況朱輪職勸農。  
終日藿鹽供一飯，

幾時膚寸冒千峯未湏丘垤占鳴鶴只要雷霆起卧龍  
從此滂沱徧枯槁愛民天子似仁宗

次韻少微甘露降太守居桃葉上

金莖甘露薦齋房潤及邊城草木香  
蒼實葉間天與味成蹊枝上月翻光  
羣心愛戴葵傾日萬事驅除葉墮霜  
玉燭時和君會否舊臣重疊起南荒

次韻奉答少微紀贈二首

詩來清吹拂衣巾句法詞鋒覺有神  
今日相看青眼舊

它年肯作白頭新  
文如霧豹容窺管  
氣似靈犀可辟塵  
慙愧相期在臺省  
無心枯木豈能春

文章藻鑒隨時去  
人物權衡逐勢低  
揚子墨池春草遍  
武侯祠廟曉鶯啼  
書帷寂寞知音少  
幕府留連要路迷  
顧我何人敢推輓  
看君桃李合成蹊

走筆謝王朴居士拄杖

投我木瓜霜雪枝  
六年流落放歸時  
千巖萬壑須重到  
脚底危時幸見持

戲答王居士送文石

南極一星天九秋自埋光景落江流是公至樂山中物  
乞與衰翁似暗投

次韻馬荊州

六年絕域夢刀頭判得南還萬事休誰謂石渠劉校尉  
來依絳帳馬荊州霜髭雪鬢共看鏡茱糝菊英同送秋  
它日江梅臘前破還從天際望歸舟

次韻答馬中玉三首

雨入紗窗風簸船菊花過後早梅前  
錦江春色薰人醉也到壺中小隱天

卷沙成浪北風顛街尾千艘不敢前  
匝岸水居皆有酒行人得意買江天

仁氣已蒸全楚盡同雲欲合莫江前  
爭春梅柳無三月對雪樽罍屬二天

次韻中玉早梅二首

梅蘂爭先公不嗔知公家有似梅人  
何時各得自由去

相逐一作揚州作好春

折得寒香不露機  
小窓斜日兩三枝  
羅幃翠幕深調一作  
遮護已被遊蜂聽得知

次韻中玉水仙花二首

借水開花自一奇  
水沉為骨玉為肌  
暗香已壓酴醾倒  
只此寒梅無好枝

淤泥解作白蓮藕  
糞壤能開黃玉花  
可惜國香天不管  
隨緣流落小民家

時聞民間  
一事如此



吳君送水仙花并二大本

折送南園粟玉花并移香本到寒家何時持上玉宸殿  
乞與宮梅定等差

劉邦直送早梅水仙花三首

鰾船綰纜北風嗔霜落千林憔悴人欲問江南近消息  
喜君貽我一枝春

探請東皇第一機水邊風日笑橫枝鴛鴦浮弄嬋娟影  
白鷺窺魚凝不知

得水能仙天與奇寒香寂寞動冰肌仙風道骨今惟有  
淡掃蛾眉簪一枝

贈李輔聖

交蓋相逢水急流八年今復會荊州已回青眼追鴻翼  
肯使黃塵沒馬頭舊管新收幾粧鏡流行坎止一虛舟  
相看絕嘆女博士筆研管絃成古丘

女博士謂輔聖後  
房孔君也於文藝

無所不能  
能皆妙絕

和高仲本喜相見

雨昏南浦曾相對雪滿荊州喜再逢有子才如不羈馬  
知公心是後彫松閒尋書冊應多味老傍人門似更慵  
何日晴軒觀筆硯一尊相屬要從容

戲呈聞善二兄

匏懸籬落鷓窺井草上皆除雪袞風想得尊前歌醉帽  
渾家兒女笑山公

次韻聞善

扶醉三竿日題詩一研埃張羅門帶雪投轄井生苔待

得成丘壑誰能把酒盃常應黃菊畔悵望白衣來

戲答王觀復醑醑菊二首

誰將陶令黃金菊幻作醑醑白玉花小草真成有風味  
東園添我老生涯

呂園未肯輕沽我且寄田家砌下栽它日秋花媚重九  
清香知自故人來

戲答荊州王充道烹茶四首

三徑雖鋤客自稀醉鄉安穩更何之老翁勸把春風碗

靈府清寒要作詩

茗碗難加酒碗醇  
暫時扶起藉糟人  
何須恐垢不濯足  
苦學梁州陰子春

香從靈堅隴上發  
味自白石源中生  
為公喚覺荊州夢  
可待南柯一夢成

龍焙東風魚眼湯  
箇中即是白雲鄉  
更煎雙井蒼鷹爪  
始耐落花春日長

次韻答高子勉十首

雪盡虛簷滴春從細草迴德人泉下夢俗物眼中埃久  
立我有待長吟君不來重玄鎮闕鑰要待玉匙開

掃雪我三日御風君過旬言詩今有數下筆不無神行  
布衾期近飛揚子建親可憐金石友去不待斯人

峴南羈旅井灞上獵歸亭日繞分魚市風回落鴈汀筆  
由詩客把笛為故人聽但恐蘇耽鶴歸時或姓丁

君不居郎省還應上諫坡才高殊未識歲晚喜無它攄  
馬羸難出鄰雞凍不歌寒爐餘幾火灰裏撥陰何

荆渚樓中賦南陽壠底吟誰言小隱處頻屈故人臨經  
笥難窺底詞源幸汲深思君眠竹屋雪月冰寒衾

驚人得佳句或以傲王公處世要清節滑稽安足雄深  
沉似康樂簡遠到安豐一點無俗氣相期林下同

志士難推轂將如高子何心期誠不淺餘論或相多欲  
向滄洲去還能小艇麼鷗鷺西照處相並曬漁蓑

鑿開混沌竅窺見伏羲心有物先天地含生盡陸沉伐  
山成大厦鼓索鑄祥金三尺無絃木期君發至音

少年基一簣長歲足三餘恐作飛黃去頓超同隊魚尊  
前八采句窓下十年書定作牛腰束傳抄聽小胥

沙上步微暖思君剩欲招萋萋穿雪動楊柳索春饒枉  
駕時逢出新詩若見撩樽前遠湖樹來飲莫辭遙

入窮巷謁李材叟翹叟戲贈兼簡田子平三首

紫冠黃鈿網絲窠蝶繞蜂圍奈晚何二叟家居如避世

開門自少俗人過

紫冠雞冠  
黃鈿黃菊

只可闕中安止止誰能鐵裏關錚錚田多穀少無人會



正似無田過一生

田郎杞菊荒三徑文字時追二叟游萬卷藏書多未見  
老夫端擬乞荊州

呈楊康國

君家秋實羅浮種已作累累半拂牆莫遣兒童酸打盡  
要睂霜後十分黃

又戲呈康國

整冠行客莫先嘗楊子家無數似牆假借肅霜令弄色

勾添寒日與爭黃

和中玉使君晚秋開天寧節道場

江南江北盡雲沙  
車騎東來風旆斜  
倒影樓臺開紫府  
得霜籬落賸黃花  
釣溪築野收多士  
航海梯山共一家  
想見星壇祝堯壽  
步虛聲裏靜無譁

謝益修四弟送石屏

石似滄江落日明  
鷗鷺烏鵲滿沙汀  
小兒骨相能文字  
乞與斑斑作硯屏

山谷集卷十

欽定四庫全書薈要卷一萬五千一百三十二

集部

山谷集卷十一

宋 黃庭堅 撰

律詩八十一首

古詩一首

雨中登岳陽樓望君山二首

至黃龍奉謁清禪師作長句呈道純

新喻道中寄元明用觴字韻

戲效禪月作遠公詠

湖口人李正臣蓄異石九峯東坡先生名曰壺

中九華并為作詩後為好事者所取乃和前  
篇崇寧元年五月二十日李正臣持此詩來  
因次前韻

追和東坡先生題李亮功歸來圖

次韻雨絲雲鶴二首 題徐氏書院

贈石敏若

罷姑孰寄元明用觴字韻

和文潛舟中所題 題君子泉

鄂州南樓書事四首

南樓畫閣觀方公悅二小詩戲次韻

次韻文安國紀夢 寄賀方回

謝檀敦信送柑子

戲答王子予送凌風菊二首

謝王子予送橄欖 以柑子小冠送子予

次韻文潛立春日三絕句

再次前韻

陳榮緒惠示之字韻詩推獎過實非所敢當輒

次高韻三首

德孺五丈和之字詩韻難而愈工輒復和成可  
發一笑

次韻德孺五丈新居病起

次韻德孺五丈感興二首

次韻德孺五丈惠貺秋字之句

求范子默染鴟青紙二首

謝榮緒惠貺鮮鯽

謝榮緒割獐見貽二首

吳執中有兩鵝為余烹之戲贈

題默軒和遵老

和涼軒二首

題東寺柱

病來十日不舉酒二首

題小景扇

次韻廖明略陪吳明府白雲亭宴集

醇道得蛤蜊復索舜泉舜泉已酌盡官酒不堪

不敢送



秋冬之間鄂渚絕市無蟹今日偶得數枚吐沫  
相濡乃可憫笑戲成小詩三首

甯子興追和予岳陽樓詩復次韻二首

和甯子興白鹿寺

謝人惠猫兒頭笋

蠟梅

短韻奉乞蠟梅

十二月十九日夜中發鄂渚曉泊漢陽親舊携  
酒追送聊為短句

次韻陳榮緒同倚鐘樓晚望別後明日見寄之

作

過土山寨

題花光畫

題花光畫山水

所住堂

題高節亭邊山礬花二首

并引

贈惠洪

戲詠零陵李宗古居士家馴鷓鴣二首

李宗古出示謝李道人苔帚杖從蔣彥回乞葬

地二頌作二詩奉呈

宜陽別元明用觴字韻

寄黃龍清老三首

雨中登岳陽樓望君山二首

投荒萬死鬢毛斑  
生入瞿塘灩澦關  
未到江南先一笑  
岳陽樓上對君山

湍川風雨獨憑欄  
綰結湘娥十二鬟  
可惜不當湖水面  
銀山堆裏看君山

自巴陵略平江臨湘入通城無日不雨至黃龍奉

謁清禪師繼而晚晴邂逅禪客戴道純款語作  
長句呈道純

山行十日雨霑衣幕阜峯前對落暉野水自添田水滿  
晴鳩却喚雨鳩歸靈源大士人天眼雙塔老師諸佛機  
白髮蒼顏重到此問君還是昔人非

新喻道中寄元明用觴字韻

中年畏病不舉酒孤負東來數百觴喚客煎茶山店遠  
看人秧稻午風涼但知家裏俱無恙不用書來細作行

一百八盤携手上至今猶夢遶羊腸

戲效禪月作遠公詠

并序

遠法師居廬山下持律精苦過中不受蜜湯而作詩  
換酒飲陶彭澤送客無貴賤不過虎溪而與陸道士  
行過虎溪數百步大笑而別故禪月作詩云愛陶長  
官醉兀兀送陸道士行遲遲買酒過溪皆破戒斯何  
人斯師如斯故效之

邀陶淵明把酒碗送陸脩靜過虎溪胸次九流清似鏡

人間萬事醉如泥

湖口人李正臣蓄異石九峯東坡先生名曰壺中  
九華并為作詩後八年自海外歸過湖口石已  
為好事者所取乃和前篇以為笑實建中靖國  
元年四月十六日明年當崇寧之元五月二十  
日庭堅繫舟湖口李正臣持此詩來石既不可  
復見東坡亦下世矣感歎不足因次前韻

有人夜半持山去頓覺浮嵐暝翠空試問安排華屋處

何如零落亂雲中能迴趙壁人安在已入南柯夢不通  
賴有霜鐘難席卷袖椎來聽響玲瓏

追和東坡題李亮功歸來圖

今人常恨古人少今得見之誰謂無欲學淵明歸作賦  
先煩摩詰畫成圖小池已築魚千里隙地仍栽芋百區  
朝市山林俱有累不居京洛不江湖

次韻雨絲雲鶴二首

煙雲杳靄合中稀霧雨空濛密更微園客繭絲抽萬緒

蛛蝥網面罩羣飛風光錯綜天經緯草木文章帝杼機  
願染朝霞成五色為君王補坐朝衣

幾片雲如薛公鶴精神態度不曾齊安知隴鳥樊籠客  
便覺南鵬羽翼低風散又成千里去夜寒應上九天栖  
坐來改變如蒼狗試欲揮毫意自迷

題徐氏書院

德占羨魚  
亭故基也

學書但學溪老鵝讀書可觀樵夫歌紫髯將軍不復見

空餘巖桂綠婆娑

老一作姥  
歌一作柯



贈石敏若

才似謫仙唯欠酒情如宋玉更逢秋  
相看領會一談勝  
注目長江天際流

罷姑孰寄元明用觴字韻

追隨富貴榮牽尾  
準擬田園略濫觴  
本與江鷗成保社  
聊隨海燕度炎涼  
未栽姑孰桃李徑  
却入江西鴻鴈行  
別後常同千里月  
書來莫寄九回腸

榮一作牢

和文潛舟中所題

雲橫疑有路天遠欲無門信矣江山美懷哉譴逐魂長  
波空寄託佳句洗眵昏誰奈離愁得村醪或可尊

題君子泉

雲夢澤南君子泉水無名字託人賢兩蘇翰墨相為重  
未刻它山世已傳

鄂州南樓書事四首

四顧山光接水光憑欄十里芰荷香清風明月無人管  
併作南樓一味涼

畫閣傳觴容十客透風透月兩明軒南樓槃礴三百尺  
天上雲居不足言

勢壓湖南可長雄胸吞雲夢略從容北船未嘗覩巨麗  
複閣重樓天際逢

武昌參佐幕中畫我亦來追六月涼老子平生殊不淺  
諸君少住對胡牀

南樓畫閣觀方公悅二小詩戲次韻

十年華屋網蛛塵大旆重來一日新五鳳樓中修造手

箇中餘乃亦精神

重山複水繞深秋不見高賢獨倚樓  
手拂壁間留恨句  
凌波微步有人愁

次韻王安國紀夢

樂城集亦有此詩

道人偶許俗人知法喜非妻解養兒  
夜久金莖添沆瀣  
室虛壁月映琉璃遠來醉俠忽忽去  
近出詩仙句句奇  
獨怪區區踐繩墨相逢未省角巾欹

寄賀方回

少游醉卧古藤下誰與愁眉唱一盃  
解作江南斷腸句只今唯有賀方回

謝檀敦信送柑子

色深林表風霜下香著尊前指爪間  
書後合題三百顆頻隨驛使未應慳

戲答王子予送凌風菊二首

病來孤負鷓鴣杓禪板蒲團入眼中  
浪說閒居愛重九黃花應笑白頭翁

王郎頗病金瓢酒不耐寒花晚更芳瘦盡腰圍怯風景  
故來歸我一枝香

謝王子予送橄欖

方懷味諫軒中果忽見金盤橄欖來想共餘甘有瓜葛

苦中真味晚方迴

戎州蔡次律家軒外有  
餘甘余名之曰味諫

以椰子小冠送子予

漿成乳酒醺人醉肉截鵝肪上客盤有核如匏可雕琢  
道裝宜作玉人冠

次韻文潛立春日三絕句

渺然今日望歐梅已發黃州首更回試問淮南風月主  
新年桃李為誰開

誰憐舊日青錢選不立春風玉笋班傳得黃州新句法  
老夫端欲把降幡

江山也似隨春動花柳真成觸眼新清濁盡須歸甕蟻  
吉凶更莫問波臣

再次前韻

春工調物似鹽梅——根中生意回風日安排催歲換  
丹青次第與花開

久狎漁樵作往還曉風宮殿夢催班鄰娃似與春爭道  
酥滴花枝綵剪幡

酒有全功筆有神可將心付白頭新春盤一任人爭席  
莫道前銜是近臣

陳榮緒惠示之字韻詩推獎過實非所敢當輒次

高韻三首



紛紛不可耐君子有憂之鞅掌誠莊語賢勞似怨詩顏  
波閱砥柱濁水得摩尼杜子美云唯有摩尼珠可照濁水源知我無枝葉  
剗心只有皮

太丘胸量闊一蒂莫杭之萬事不掛眼四愁猶有詩狀  
閒聊闌茸心潔似毗尼僧律也早晚同舟去烟波學子皮

再和之字韻非以作難得巧  
為工亦欲見詩之無窮爾

十家有忠信江夏可無之政苦寄賣友忽聞衡說詩飢

蒙青執飯寒贈紫陀尼蕃酬報矜難巧深慚陸與皮

德孺五丈和之字詩韻難而愈工輒復和成可發一笑

且然聊爾耳得也自知之獨笑真成夢狂歌或似詩照  
灘禽郭索燒野得伊尼鹿名出佛書早晚來同醉僧窓卧虎  
皮

次韻德孺五丈新居病起

潭潭經略府寂寂閉門居京洛聖賢宅江湖魚鼈瀦官  
如一夢覺話勝十年書稍喜過從近扶筇不駕車

次韻德孺五丈感興二首

於此吾忘我從誰尺直尋事來千萬種人有兩三心自  
守藩籬小猶能井臼任過時雖不采吾與菊花斟

眼前嘗廢忘事往更追尋愛酒陶元亮著書王仲任寒  
蒲雖有節枯木已無心客至還須飲逢歡起自斟

次韻德孺五丈惠貺秋字之句

少日才華接貴游老來忠義氣橫秋未應白髮如霜草  
不見丹砂似箭頭顧我今成喪家狗期君早作濟川舟

漢家宗社英靈在定是寒儒浪自愁

求范子默染鴟青紙二首

學似貧家老破除古今迷忘失三餘極知鵠白非新得

漫染鴟青襲舊書

老一作免

深如女髮蘭膏罷明似山光夜月餘為染藤溪三百箇  
待渠湔拂一牀書

謝榮緒惠貺鮮鯽

偶思煖老庖玄鯽公遣霜鱗貫柳來  
蠶曰方看金作屑

鱠盤已見雪成堆

謝榮緒割獐見貽二首

何處驚麇觸禍機  
煩公遣騎割鮮肥  
秋來多病新開肉  
糲飯寒羶得解圍

二十餘年枯淡過  
病來筋下劇甘肥  
果然口腹為灾怪  
夢去呼鷹雪打圍

吳執中有兩鵝為余烹之戲贈

學書池上一雙鵝  
宛頸相追筆意多  
皆為涪翁赴湯鼎

主人言汝不能歌

題默軒和遵老

平生三業淨在俗亦超然佛事一盂飯橫眠不學禪松  
風佳客共茶夢小僧圓漫續山家頌非詩莫浪傳

和涼軒二首

打荷看急雨吞月任行雲夜半蚊雷起西風為解紛  
茗椀夢中覺荷花鏡裡香涼生只當處暑退亦無方

題東寺柱

康州詩

竹風松月牢於鎖，關閉人心物外情。  
燕雀聞經俱已慣，飛來不怕讀書聲。

病來十日不舉酒二首

病來十日不舉酒，獨卧南牀春草生。  
承君折送袁家紫，

令我發與郎官清。

發與一作興發

病來十日不舉酒，回施青春興後生。  
滿袖東風愜人意，見君詩與字俱清。

題小景扇

草色青青柳色黃  
桃花零落杏花香  
春風不解吹愁却  
春日偏能惹恨長

次韻廖明畧陪吳明府白雲亭宴集

江淨明花竹  
山空響管弦  
風生學士塵  
雲繞令君筵  
百越餘生聚  
三吳遠接連  
庖霜刀落鱠  
執玉酒明船  
葉縣飛來鳥  
壺公謫處天  
酌多時暴龍  
舞短更成妍  
唯我孤登覽  
觀詩未究宣  
空餘五字賞  
文似兩京然  
醫是肱三折  
官當歲九遷  
老夫看鏡罷  
衰白敢爭先

大一作大



醇道得蛤蜊復索舜泉舜泉已酌盡官酒不堪不

敢送

青州從事難再得牆底數樽猶未眠商畧督郵風味惡  
不堪持到蛤蜊前

秋冬之間鄂渚絕市無蟹今日偶得數枚吐沫相  
濡乃可憫笑戲成小詩三首

怒目橫行與虎爭寒沙奔火禍胎成雖為天上三辰次  
未免人間五鼎烹

勃窣嬖跚烝涉波草泥出沒尚橫戈也知殼觫元無罪  
奈此尊前風味何

解縛華堂一座傾忍堪支解見薑橙東歸却為鱸魚膾  
未敢知言許季鷹

甯子興追和予岳陽樓詩復次韻二首

去年新霽獨憑闌山似樊姬擁髻鬟箇裏宛然多事在  
世間遙望但雲山

軒皇樂罷拱清班天地為家不閉關惟有金爐紫煙起

至今留作御前山

和寧子興白鹿寺

谷郎巖開見佛燈雲遮霧掩碧層層青山得意看流水  
白鹿歸來失舊僧

謝人惠貓兒頭笋

長沙一月煨鞭笋鸚鵡洲前人未知走送煩公助湯餅  
貓頭突兀想穿籬

蠟梅

天工戲剪百花房奪盡人工更有香埋玉地中成故物  
折枝鏡裏憶新粧

短韻奉乞蠟梅

卧雲莊上殘花笑香似早梅開不遲淺色春衫弄風日  
遣來當為作新詩

十二月十九日夜中發鄂渚曉泊漢陽親舊攜酒  
追送聊為短句

接浙報官府敢違王事程宵征江夏縣睡起漢陽城鄰

里煩追送杯盤瀉濁清祇應瘴鄉老難答故人情

次韻陳榮緒同倚鐘樓晚望別後明日見寄之作

天外僧伽塔斜暉極照臨凭闌隨處好殘雪向來深青

草無風浪枯松半死心

所謂城南  
老樹精

衡陽有回鴈他日更

傳音

### 過土山寨

南風日日縱篙撐時喜北風將我行湯餅一杯銀線亂

萋蒿數筍玉簪橫

題花光畫

湖北山無地湖南水徹天雲沙真富貴翰墨小神仙

此平

沙起水筆意超凡入聖境也每率此為之當冠四海而名後世

題花光畫山水

花光寺下對雲沙欲把輕舟小釣車更看道人煙雨筆  
亂峰深處是吾家

所住堂

此山花光佛所住今日花光還放光天女來修散花供

道人自有本來香

題高節亭邊山礬花二首

并引

江湖南野中有一種小白花本高數尺春開極香野  
人謂之鄭花王荊公嘗欲作詩而陋其名予請名曰  
山礬野人採鄭花葉以染黃不借礬而成色故名山  
礬海岸孤絕處補陀山譯者以謂小白花予疑即此  
花爾不然何以觀音老人端坐不去耶

世作瑒花山  
谷寫為鄭

高節亭邊竹已空山礬獨自倚春風二三名士開顏笑

把斷花光水不通

北嶺山礬取次開清風正用此時來平生習氣難料理  
故著幽香未擬回

贈惠洪

數面欣羊腴論詩喜雉膏眼橫湘水暮雲獻楚山高墮  
我玉麈尾乞君宮錦袍月清放舟舫萬里渺雲濤

戲詠零陵李宗古居士家馴鷓鴣二首

李唯一妻  
一女垂老病

足養鷓鴣鸚  
鵡以樂餘年



山雌之弟竹雞兄乍入雕籠便不驚此鳥為公行不得  
報晴報雨總同聲

真人夢出大槐宮萬里蒼梧一洗空終日憂兄行不得  
鷓鴣當是鼻亭公

李宗古出示謝李道人苕帚杖從蔣彥回乞葬地  
二頌作二詩奉呈

提攜禪客扶衰杖斷當姻家葬骨山因病廢茶仍廢酒  
鷓鴣鸚鵡伴清閒

詩書傳女似中郎杞菊同盤有孟光今日鷓鴣鳴蹇蹇  
他年鸚鵡恨堂堂

宜陽別元明用觴字韻

霜須八十期同老酌我仙人九醞觴明月灣頭松老大  
永思堂下草荒涼千秋風雨鴛鴦求友萬里雲天鴈斷行  
別夜不眠聽鼠齧非關春茗攪枯腸

寄黃龍清老三首

萬山不隔中秋月一鴈能傳寄遠書深密伽陀枯戰筆

真成相見問何如

風前橄欖星宿落日下枕柳羽扇開照默堂中有相憶  
清秋忽遣化人來

騎驢覓驢但可笑非馬喻馬亦成癡一天月色為誰好  
二老風流只自知

山谷集卷十一